

新鄉縣續志

卷五
傳

新鄉縣續志卷五

循吏傳

古之循吏德化爲上教養次之除暴安良又次之世衰道微民情不古宦無久任求如漢循吏之德化固不易見而教養亦有所難言但得有心乎民者能爲之除莠而安良斯足以著循聲而膺上考今所謂循吏豈絕詣哉惟望牧斯民者流覽前型不遑多讓則民受福矣

趙開元字質齋江西奉新人乾隆丁巳進士初令湯陰調新鄉文廟傾圯節俸修之建鄘南書院親授生徒第甲乙從遊甚衆彬彬如也乾隆舊志皆公手定後內擢主事海歷郎中簡雲南楚雄府知府未之任卒

錢汝恭號旼齋浙江嘉興人乾隆辛丑以名孝廉蒞新勤求民隱

善政多端時邑南趙村賈屯等五十餘村因康熙間馬營工開口
浸壞田畝三百餘頃荒磧不毛祇潮鹽碱民食維艱賦無所出公
廉得其情屢詳請巡撫何公奏准減徵民慶更生猶解倒懸焉然
是役也微公弗克辦蓋漕糧乃維正之供貢賦爲國用之源卽有
水旱偏災或河流漂沒展緩例有可援減免豈易爲力公乃痛陳
大府勢在必成誠以公父陳羣職在太傅天子素知公爲循良吏
也故得邀俞允公之德民之福亦千載一時之際會耳至今俎豆
馨香永永弗替宜哉城內鄴南書院南鄉趙村均建有生祠

王希旦字晉笙以江蘇名進士來令斯邑寬和爲政民無冤獄而
於書院試士尤勤懇閱卷躬親不假他手課文以先正爲宗不屑
屑時藝文風大振顏講堂曰學宗遽里規模可想見矣時朱杲李
向榮李耀林名噪一時而縣試特拔衛榮光首卷且曰此生芙蓉

寶鏐燁燁射人將來必成偉器不數年而衛榮光以鄉會聯捷入詞林識者偉之當是時洪逆盤據金陵剿撫需才胡林翼督師南征調奏衛榮光參贊行營克復潛山太湖等處多奏奇績雖督師知人而拔才俊於風塵之表要非王公鉅眼不及此後衛榮光撫蘇訪王公之孫孝廉某優禮之以報知己一時傳爲佳話左光斗識史可法熊廷弼知盧象昇皆拔自寒素卒爲名臣而王公具此藻鑑斯先後輝映矣

祝壇字爽亭陝西磚坪縣人以進士卽用於咸豐五年履任時年二十六歲適值連庄會滋事抗爭土方加價勢焰方熾有言新官潛攜軍器來者張炳等遂糾衆圍署公冠服危坐大堂任其入內搜查門丁楊某咤曰此豈非反耶衆怒摔而殺之又殺差役六人公屹然不少動張炳侍側見搜查無驗旋率衆去而麇聚於龍泉

寺演戲酌神東請蒞會時書差逃散一空單騎赴之蓋陽以示不疑陰欲察其動靜以爲之備耳至則開誠布公曲示利害而喧呶者衆要挾多端知其不可情遣理喻也歸卽告急請兵力繕城守越數日張炳以殺差役爲名率衆至城下環而攻之不得入旋衆負門板推火藥車至東門外洞焚之火焰彌空勢岌岌殆公短衣持械率守陴之衆汲水灌救數時始熄相持又累日而大兵至炳衆稍南退大兵陣於南壇左右槍聲隆隆炳衆乃鳥獸散是役也非沉幾觀變因應有方幾滋蔓難圖矣遂立請大府奏停土方加價誅張炳等數人脅從概置不問而人心大定事平亟爲善後計城鄉村鎮擇立鄉約所數十處分延庠序中人宣講鄉約以明人倫嚴定章程編查保甲不時微服巡行城鄉殆徧往往詞訟案件卽於道途間訊結無煩籤票催傳而查有穰莠之民痛懲不少貸

亦不待人控告不數月間咸頌神明書院月課必親加評閱朔望集諸生抽籤講書皆爲引伸其義時河內在籍詹事府詹事李文園先生主講河朔書院禮延之來留數日爲諸生講洛學大旨蓋所希者賢聖不區區在科第間此以見經濟學問非俗吏比也先是潞王墳地涉訟頻年至公乃親詣履勘檢查舊卷得奸僧蒙混侵佔狀立爲斷結以所開山地若干頃充書院經費尤卓識毅力稱道至今不衰在任五年家絃戶誦婦孺皆畏懷之隣封士民迭聽風聲輒欣欣相告曰祝太爺真好官新鄉何修而得之旋升任去遠近父老子弟攜榼恭饌者幾萬人香花載道絡繹數里多歔歔泣下者樂只君子民之父母庶無愧焉城內書院及永康俱建有生祠

汪慶長字雲芝山東泰安人以進士光緒六年任品端學粹治尚

寬仁尤樂誘掖後進月課考試皆親加評騭優予獎勵邑人田芸生趙一揆傳清壇皆其所裁成者期年之間文風丕振每告期接呈詞必多方勸導令自息訟常有聽從悔悟求將原呈擲還者至今人猶德之

羅梁材字韓蒔廣西蒼梧人光緒十年以名孝廉令新政尙寬和遇訟事循循勸導如家人父子政簡刑清一時稱最每月書院課試卷必親閱遇寒畯誘掖獎勸不遺餘力自作講堂楹聯曰祇此行己修身盡得一分就算一分真事業做到仁民愛物流傳千古便爲千古大文章梗概可想見矣時王安瀾夏奠川等均荷栽培書精米法到處珍之二十三年補臨穎未任而卒

呂相曾字芙岑山東萊蕪人民國四年令斯邑政尙嚴肅不少假借嘗曰惟有德者能以寬治民其次莫如猛吾爲其次者歷任滑

郊有聲在新案無積牘民少滯獄日本長記設棧西站買桐轉運
公以新鄉非通商口岸不准設棧據約力爭迫令取銷合河朱止
容巨匪也黨徒多人搶劫案件層出叠見通緝數年不獲上憲嚴
檄擒治密飭幹差授方略差以巨匪生擒不易檜斃之而以屍抬
驗遂照相詳呈上憲十數年隱憂一旦除之倘所謂神明宰者非
耶惡捕婁中魁膽大妄爲罪不容誅廉得其情立斃杖下衆人稱
快其他發覆摘奸頗多此其大端也且修葺文廟關岳合祠數年
傾敗煥然一新是年新境多蝗委王元吉戚久順董其事四月之
久剷除殆盡年餘調遷沁陽電留未允嗣卒於新寓柩回山東執
紼而送者多人可見善政之在人也

家範彙編卷五

新鄉縣續志

人物傳上

忠義

舊志闕忠義傳如郭宗伯之精忠亮節亦泛列人物似未盡愜茲查咸豐同治間迭遭匪患邑人殉難者頗不乏人有已入忠義祠者豈可闕而不傳特增入之以示彰顯庶忠肝義膽爲國捐軀者尙凜凜有生氣焉

王揆一字聖田號槐軒幼聰敏能文章弱冠以冠軍入邑庠乙未領鄉薦甲辰大挑一等分發河工丁未成進士以即用分發湖南署道州知州政平訟理善於勸化强悍之風以戢計擒巨盜民賴以安時廣西髮逆初熾州縣多無兵備提督余萬清赴道州防堵聞賊至開城遽去以致失守公投河殉之飄流數里遇救嗣經官

文端胡文忠奏准隨營效力贖罪感激圖報多所贊畫以功奏准開復原官咸豐八年隨浙藩李忠武三河鎮剿賊衆寡不敵與李同遇難胡文忠奏請優卹奉旨特賞銀三千兩治喪子錫侯承襲雲騎尉世職予謚忠烈並崇祀五忠祠

安昌王輅忠烈王公傳公諱揆一字聖田號槐軒世爲新鄉人幼受業於衛漢卿先生讀書敏捷善屬文弱冠冠童子軍入邑庠益攻苦力學不忍稍懈年二十四登河南乙未賢書家貧以舌耕爲業遊其門者日益盛常云士人幸列科第爲一方之望卽未出仕而人心風俗亦有匡救之責故凡與族黨鄉鄰相接一言一動無不本孝弟和睦忠信篤敬以出之人未有敢以無行之事干之者甲辰大挑一等分發河工中牟大工上憲委以總查並管錢庫事親履河干晝夜巡視所用之人皆不敢以一

文自私丁未需次山東道憲王謂公非佐貳所宜予川資勸應
禮闈卽於是年成進士以卽用知縣籤分湖南公慨然曰爲官
要貴不負初心建樹猶後也到省後巡撫駱文忠公深爲倚重
每遇難辦之事多委任焉公不避勞怨無不寔事求是候補一
年遂題署道州知州事其地素稱强悍盜案層見疊出蒞任時
詞訟蠭集公次第審理夜以繼日不使差役有屈押人犯亦不
忍令有一人枉受拖累差人票傳嚴限時日隨到隨問隨隨
結且自作和睦安業禁盜息訟諸條約以勸化之訟事遂爲衰
減時有著名大盜高扒腸王三鉤楊打不死潘三等巢居山僻
中破錢爲符一日夜可聚千餘人劫奪富家老幼令失主出銀
贖聲言若干兩如數與者卽爲放回與一半者削一耳或掘
一日放回不與者殺之其地屬道州及江華甯遠兩縣交界公

於接見僚紳時先詢其大畧遂微服徒步懷乾糧帶家丁二三
人往探籍草宿古廟中五晝夜始得訪查真確乃同本城遊擊
並率領差役突入巢穴獲其首領高扒腸王三鉤兩人楊潘兩
人嗣亦爲江華甯遠所獲地方遂以安靜於是興學校修綱紀
布政教一切廢墜莫不悉舉訪知孝子一人特以花紅匾額旌
異之二年後題補湘鄉縣知縣道州紳民赴府赴省泣訴稟留
府憲徐亦以道州現經王牧整頓方有頭緒革薄從忠人心亦
漸向善一旦卸去恐風氣如故等情請暫緩飭赴新任上憲遂
許展期署理咸豐辛亥廣西髮逆大肆屢破城池勢甚猖獗湖
廣總督官文端公以道州地處險要奏派提督余萬清赴道州
防堵賊既近萬清潛開城門將兵帶去賊遂闖入公率丁勇巷
戰左臂中傷知勢不可爲乃謂家丁曰汝輩各自逃生吾義不

可去乃具朝服向北九叩首危坐堂上曰此地卽吾墓也紳民
皆哭泣解勸出城不肯從衆遂爭前負公以出公卽投河乃水
深四丈飄浮而下不稍沈家丁楊玉綠岸緊跟五里外遇一小
舟急呼之將公救出衆村民乃以車送公至永州府城下太守
徐開城延至署中換去濕衣親視飲食加以百端勸慰兩月始
痊且稟知欽差大臣賽驗明傷跡嗣經部議照本罪減等發新
疆駱文忠公乃以地方多事需才孔亟懇請暫緩發遣以資指
臂之力兩次入奏未蒙俞允乃復與官文端公湖北巡撫胡文
忠公三次會奏始奉旨准在湖北巡撫胡營中効力贖罪公既
至胡營胡公一見卽刮目待之公襄辦軍務不辭勞瘁不避危
難屢獲大勝於收復常德澧州崇陽通城九江諸案內經胡公
保奏奉旨准其開復原官旋派總理營務處事嗣是本土母本

生父相繼辭世公兩次懇請回籍守制上憲皆以正在用人之際奏明不准回籍公遂墨經從戎復城取地所向皆捷乃以咸豐八年隨浙江藩司李忠武公在安徽三河鎮剿賊適值賊眾我寡與李忠武同時遇難胡文忠公爲上奏云前署湖南道州事即用知縣王揆一河南新鄉進士署道州時廉仁愛民自以失守嬰罪日懷愧憤籌辦軍糈不辭勞瘁四年隨臣胡林翼恢復常德澧州駐防岳州收復崇陽通城五年隨臣胡林翼防勦沌口金口經督臣官文奏請隨營効力贖罪派往黃州一帶防勦備嘗艱險調赴九江襄理軍務隨勦湖口彭澤策馬行間親冒矢石連戰大勝八年四月初九日出壘衝擊力竭陣亡應請追贈安潛太桐舒等縣十月初九日出壘衝擊力竭陣亡應請追贈同知照同知例從優議卹奉旨允准特賞銀三千兩治喪子錫

侯承襲雲騎尉世職予謚忠烈並崇祀五忠祠蓋公自道州求死不得以來久已置性命於度外特以兩文忠相知甚深遂矢志捐軀報國以求無負兩公知人之明非復有希榮邀寵之意也乃宣力行陣屢獲大捷適以賊衆我寡與李忠武同時盡節而公之志於是遂公之心亦於是益明矣方公之未仕家居也孝於親友於弟睦於族黨和於鄉鄰久爲里人所欽仰逮需次河工時去家不遠每旋里遇鄉間父老在野耕耘者必下車與之促膝坐地話桑麻道家常及孝弟忠信之行鄉人皆化而樂就之故於其歸葬也耕氓野老皆爲相嚮而泣焉公生於嘉慶十七年十月二十一日卒於咸豐八年十月初九日年四十有七子二長錫侯庚午科舉人西平縣教諭承襲雲騎尉世職次安侯邑庠生孫二長毓福次毓祺

論曰余始識公於河北工次觀其言論丰采知其有才有志不與凡庸伍後公筮仕湖廣雖時有傳聞未能詳悉及讀公行狀然後知公爲循吏爲忠臣誠有以大過人者夫當咸豐間寔能摧破賊鋒收復城池者兩文忠之力爲多而無不愛公之才重公之品則公之爲公可知矣乃始瀕死於營道卒盡節於三河不獲大展其用焉君子特爲之深惜云

沈金山字靜峯野虎林人幼習拳棒武藝冠一時咸豐十一年冬月東匪入境率本村壯丁四十餘人拒賊於村前賊三十餘騎望而披靡越數日賊又蜂擁而至寡不敵衆奮戰力竭遂遇害子文化具呈請卹蒙賞卹銀賜匾額曰効忠授命并入祀忠義祠

梁君龍梁君虎邑西鄙之義勇人也居野虎林兄弟皆勇武稱萬人敵同治年間捻匪擾境率家人避難於鄰村之任家營繼慮其